

大宋新譯三藏聖教序 前

太宗神功聖德文武皇帝製

大矣哉我佛之教也化導群迷闡揚宗性廣博宏辯英彥莫能究其旨精微妙說庸愚豈可度其源義理幽玄真空莫測包括萬象譬喻無垠綜法網之紀綱演無際之正教拔四生於苦海誼三藏之秘言天地變化乎陰陽日月盈虧乎寒暑大則說諸善惡細則比於恒沙含識萬端弗可盡述若窺像法如影隨形離六情以長存歷千劫而可久須彌納藏於芥子如來坦蕩於無邊達磨西來法傳東土宣揚妙理順從指歸彼岸菩提受河生滅用行於五濁惡趣拯溺於三業途中經垂世以難窮道無私而永泰雪山貝葉若銀臺之耀目歲月煙蘿起香界之自遠巍巍罕測杳難名所以道資十聖德被三賢至道起於軋元象妙生乎太易惣繁形類竅鑿昏明絕彼是非開茲蒙昧有西域法師天息災等常持四忍早悟三乘翻

貝葉之真詮續人天之聖教芳猷重

啓運偶昌時潤五聲於文章暢四始於風律堂堂容止穆穆輝華曠劫而昏墊重明玄門昭顯軌軌而彌光妙法淨界騰音利益有情俱登覺岸無成郭礙救諸疲羸冥昧慈悲浩汗物表柔伏貪恨啓滌昏愚演小乘聲聞合其儀論大乘正覺立其性含靈悟而蒙福藏教設而重興幻化迷途火宅深喻雖設其教不知者多善念生而無量潛臻惡業興而隨緣皆憤調御四眾積行十方樹花雨於金輪護恒沙於玉闕有頂之風不可壞無際之水弗能漂澄寂湛然圓明清淨之智慧性空無染妄想解脫之因緣可以離煩惱於心曰可以得清涼於宇宙朕慙非博學釋典微聞豈堪序文以示來者如縻瑩燭火不足比之於皎日將微蠶量海未能窮盡於深淵者哉

繼作聖教序

御製

高明肇分三辰方乃序其次序載初

定萬彙於以發乎端清濁之體既彰

善惡之源是顯然後以文物立其教以正典化其俗利益之功同歸於理於是乎像法來於西國真諦流於中夏洞貫千古真實之理無以窮囊括九圍玄妙之門莫能究言乎妄想則五蘊皆空現乃真容則一毫圓滿廣大之教豈能紀述者哉伏覩太宗神功聖德文武皇帝法性周圓仁慈普布化壘細則萬邦輻湊躋烝民於仁壽之鄉崇教法則四海雲從惠蒼生於富庶之域見尊經之浩汗設方便以救沉淪知法界之恢宏行精進而攝憊怠乃擇其遠字拔彼真文命天生之高僧譯貝多之佛語象管翻成於金字珠編復置於琅函龍宮之聖藻推新驚嶺之苾芻仰歎由是三乘共貫四諦同圓盡苦空真正之言顯秘密精研之義讚相相乎實相論空空乎盡空華嚴之理合軌軌金像之教同規矩朕續詞丕構恭臨寶圖常翼翼而撫北民每兢兢而守

先訓以至釋典尤未精詳諒其幽深
曷能探測有譯經西域僧法賢秦章
懇切致意專勤以

先皇帝大闡真風高傳佛旨與前王
之隆典振覺路之頽綱欲旌天造之
功庸用廣

聖文之述作請予製序繼聖教焉自
聖考上僊追號罔息政事之外何暇
經心今已禪除思臻微奧雖幼承慈
誨奈夙乏通才焉窮乎法海之津涯
莫造乎空門之闡域略敷大意以徇
輿情蹄涉不足擬浴日之波尺蠖豈
能量昊天之恩聊述短序以紀聖功
者焉

集大乘相論卷上

覺吉祥智菩薩造

受經者... 覺吉祥智菩薩造

歸命妙吉祥菩薩摩訶薩我今略釋
諸大乘相從菩提心出生大悲相應
所謂一切法即當了知一切法無我
此所知相是故今說
此中何名一切法所謂蘊處界緣生
波羅蜜多地空菩提分聖諦靜慮無

量行無色等至解脫三摩鉢底先行
解脫門神通陀羅尼力無所畏無礙
解大慈大悲佛不共法諸聲聞果了
知一切相真如實際無相法界等法
是謂一切法

所言蘊者謂即五蘊何等為五色受
想行識此中色者五根五境根謂眼
耳鼻舌身境謂色聲香味觸彼眼識
所依謂清淨眼根耳識所依清淨耳
根鼻識所依清淨鼻根舌識所依清
淨舌根身識所依清淨身根色有二
種顯色形色顯謂青等形謂長等聲
有三種謂執受大種不執受大種俱
大種香有二種謂好香惡香味有六
種謂苦醋甘辛鹹淡觸有十一種謂
堅強流潤溫燥輕動重輕滑澁軟飢
渴等如是諸觸略略而說有其三種
謂可意不可意及二中間此如是等
由眼等所生若界趣等分別三世分
別有無邊分微細差別行相應知此
如是等略說色蘊受蘊云何受有三
種謂苦受樂受非苦樂受而此三受
若依眼等分別者有其六分彼如是

分別受有十八如下界中別明行相
此受蘊者若界趣等分別有無邊分
行相應知此如是等略說受蘊想蘊
云何想有六種此之行相謂依眼等
分別彼所取境相有其六種所取相
者謂即色等然所依性即不可分別
若分別若不分別謂即色受二法此
如是等皆從我蘊自類所起此想蘊
者若界趣等分別有無邊分行相應
知此如是等略說想蘊行蘊云何謂
心所有法信等善分貪瞋癡等諸煩
惱分如是心所法心諸分位所有行
相依眼等轉此行蘊者若界趣等分
別有無邊分行相應知此如是等略
說行蘊識蘊云何謂六識身此識蘊
者若依眼等根色等境分別及彼識
相乃至善不善無記等分別有無邊
分行相應知此如是等略說識蘊如
前說名爲五蘊
所言處者即十二處謂內六處眼耳
鼻舌身意外六處色聲香味觸法此
中應知眼等五根色等五境爲十色
處彼意處者謂即諸識所餘諸法是

為法處

本無相論卷上

第七

前

所言界者即十八界謂六根界六境界六識界此中眼等識分別有六即有六觸謂眼觸乃至意觸彼色等識有三種相謂善不善及彼中間此之行相眼等觸為三受所生因性即彼三受從眼等觸所生有六彼六各各三種分別謂苦樂非苦樂如是摠說觸受各有十八如前受蘊所指行相亦然

復次地水火風空識等相名為六界所言緣生者云何行相即十二緣生何等十二所謂無明乃至老死此中無明者謂於業果諦實法中不正行故由此無明起諸煩惱是故於無我中計我蘊等而有所得無明緣行行有三種福行罪行不動行福行謂十善業道罪行謂十不善業道不動行謂無色等至彼如是行以其無明為因諸行得生行緣於識是故眼等諸識愛非愛果種子生長識緣名色此名色者謂由識故施設彼名各有生處是故受等四蘊為名色即如應依

名而立名色緣六處彼六處者謂由

本無相論卷上

第八

前

二

如是名色眼等六處建立六處緣觸觸謂眼等色等如前已說觸緣受受有三種亦如前說此中觸受行相應知受緣愛愛由無明受緣取取謂色等所取所生樂行取緣有有行相者謂即如前所說行識等相有緣生謂即名色有所生起由彼無明故有生法即此無明自性亦無分位生緣老死老謂諸蘊衰變死謂諸蘊滅壞生法後邊而無其實先所得身而悉捨雖然彼無明於後蘊中還復隨轉增長一切煩惱過失彼等皆由無明自類煩惱業等而為其因是故煩惱業生此三不斷以是輪迴相續流轉如是知者當於實法而起對治了無明等自性無我如是等略說十二緣生所言波羅蜜多者云何行相其數有十此中施有三種謂攝律儀戒攝善法戒饒益有情戒忍辱三種謂諦察法忍耐怨害忍安受苦忍精進三種謂被甲精進加行精進畢竟成就精進定

有三種謂離過失定引發定辦事定

本無相論卷上

第九

前

三

慧有三種謂聞所成慧思所成慧修所成慧方便三種謂離過方便極濟方便速證樂方便願有三種謂自修成就願解眾生縛願清淨佛土願力有三種謂成辦事業力滅除煩惱力降伏魔怨力智有三種謂無分別智分別平等智了智滅眾生罪智如是施等諸波羅蜜多以菩提心為先於一切眾生起慈心觀而此諸波羅蜜多於諸世間所行無有行相亦無所得於出世蘊等是即無我解脫相真實所證如理而觀所言地者即彼十地所謂歡喜地修施波羅蜜多離垢地修戒波羅蜜多發光地修忍辱波羅蜜多焰慧地修精進波羅蜜多華勝地修定波羅蜜多多現前地修慧波羅蜜多遠行地修方便波羅蜜多不動地修願波羅蜜多多善慧地修力波羅蜜多法雲地修智波羅蜜多如是諸地所得法無我理皆慈心所證悉無差別而彼所修施等諸波羅蜜多安住清淨勝上所

得廣大願力普徧成就不共一切聲聞等故是諸波羅蜜多於所緣相而無差別若人若法離相空故所言空者即十八空謂眼等空是名內空色等空是名外空眼等色等智觀平等名內外空方等諸分器世間相各各觀察一一皆空是名大空於諸分別離取捨性說名為空此空復空是名空空於勝義諦觀不可得名勝義空於施等行諸有為法皆悉平等名有為空諸無為法無發悟相名無為空於空法中無有少法而實可轉散而無集是名散空彼一切法無有邊際名無際空一切法中畢竟無餘一法不空名畢竟空蘊等諸法自性如是無所生起離自取捨相名自相空彼一切法空無差別名一切法空於我蘊中取捨不可得名不可得空此不可得謂色等相不可得故但有諸業性是名無相空若人若法彼自性空是名自性空於諸性中離取捨性名無性空彼無性者謂離蘊等無別性故若離蘊等自性起空分別

者是對礙相即名無性自性空若彼如是分別盡處即能解脫色等繫縛無復分別有無邊分離蘊等取捨是即一相而彼一相性無有二彼如是故即於波羅蜜多安住一境自性空理離戲論相是即無我真實所觀所言善提分者即三十七善提分謂四念處乃至八正道四念處者身受心法此中身念處者觀身無有種種積集而無所著離取捨相是名身念處彼受念處心念處法念處亦如是觀又復即此法念處中若於內外中間而分別者別有三種謂精進定正念此三相應即能觀察諸菩薩最勝善提心及施等善行於一切法中得無我相應此念最勝如是略說名四念處所餘諸法亦如是知四正斷者謂是所對治非善提分即已生令斷未生令不生此名勤斷二不善非所對治是善提分未生令生已生令增長此名勤修二善如是略說名四正斷四神足者謂欲精進三摩地慧如是

相應行增上所得果以其所得而觀欲等所緣謂四種三摩地而彼身心離諸所依住離貪想依止寂滅無所作行如是略說名四神足五根五力者即了知一切相果謂信精進念定慧等增上相應根力如是略說名五根五力復次此中如是等所修即二覺了分謂煖頂位煖位修四念處頂位修四正斷又復有二勝覺了分謂忍世第一法忍位修四神足世第一位修五根五力彼如是等無所作行最上真實信等根力為見道緣行相應知彼見道所修謂七覺支七覺支者即念覺支乃至捨覺支此中念覺支者謂利眾生證菩提願現前正念無忘失相擇法覺支者謂於我法自性決擇為相喜覺支者謂自所修道得無漏因生喜樂故輕安覺支者謂如其所證真實法性非善提分種子而捨離故身業心業得輕安故定覺支者謂四無量及善提願入真如智純一境相精進覺支者謂雖

法隨應行相摠略攝故

觀寂靜勝上功德門而不味著進修

諸行復無懈怠捨覺支者謂念利衆

生如應調伏隨其所行波羅蜜多等

諸功德法平等分別觀無來去住平

等故如是略說名七覺支即如是等

七覺支行名正智分彼能對治煩惱

障及所知障行相應知修造所修即

八正道

八正道者謂正見乃至正定此中正

見者謂了一切法無我相住於平等

苦等顛倒彼之二分是微妙相勝慧

所觀正思惟者謂起思惟不斷所作

因如願而證果正語者謂諸語言離

妄分別如實而說正業者謂諸所作

而無顛倒不害衆生救拔衆生等謹

妄而修正命者謂於淨命離諸邪妄

自行所修自行而證正勤者謂雖至

最上地而亦增進身無疲倦心生勇

悍正念者謂念處等如實而觀慈心

莊嚴自願方便於一切法無所忘失

正定者謂身等業而常依止最勝功

德安住無分別智即諸靜慮相平等

相應如是等略說名三十七菩提分

法隨應行相摠略攝故

集大乘相論卷上

甲辰歲高麗國大藏都監奉

勅彫造

集大乘相論卷上

校勘記

一 底本，麗藏本。

一 六六七頁上一行至次頁上一四行

兩篇聖教序文，碩、南、徑、清無。

一 六六八頁上一七行譯者，徑、清作

「宋西天三藏朝奉大夫試光祿卿

傳法大師施護奉詔譯」。

一 六六八頁下一三行「界趣」，徑、清

作「趣界」。

一 六六九頁上一四行「諦實法」，碩、

普、南作「諦實法」，徑、清作「謂實

法」。

一 六七〇頁中一二行「內外」，徑作

「心外」。

一 六七〇頁中一四行「三相」，碩作

「二相」。

一 六七〇頁中二一行第一三字「是」，

徑無。

一 六七〇頁下二二行末字「入」，徑

作「人」。



集大乘相論卷下

覺吉祥智菩薩造

要經經藏卷下 大藏經總目 卷下 經 幸 謹 譯

復次所言聖諦者即四聖諦謂苦集滅道此中苦聖諦者謂蘊等顛倒相背聖法為性集聖諦者謂如所說苦由此無明行等煩惱業集為緣與生等若而為因性滅聖諦者謂於一切法如實無分別無生相為性世間癡暗對治滅如所證道聖諦者謂趣向菩提慈心等法及法念處略攝故此諸聖諦於一切法平等所緣如是略說名四聖諦

所言靜慮者即四靜慮謂離生喜樂名初靜慮定生喜樂名第二靜慮離喜妙樂名第三靜慮捨念清淨名第四靜慮如是等四皆寂止相欲界等貪心不流動是名靜慮然諸菩薩亦不味著諸靜慮樂畢竟不捨眾生圓滿菩薩道法成就無量行如是略說名四靜慮

所言無量行者即四無量行謂慈悲

喜捨此四皆緣無量眾生為境界故此中慈無量行者謂與一切眾生畢竟利樂所修諸行而悉離相遠離顛倒順菩薩道悲無量行者謂不令眾生而有一苦此悲謂能對治惱害不起為性喜無量行者謂證一切法無我平等所有施等諸善住菩提心廣為利樂一切眾生方便所行如所生喜為喜受相捨無量行者謂於三有分別平等起廣大行拯救眾生於自所得三摩地樂而不味著此能對治放逸過失心住實相如應調伏世間一切執相等心已能安住靜慮於諸色想對治實法復於無量法門得法平等住法無我如理而證所獲一切平等樂法是名自在最勝所得如是略說名四無量行

所言無色等至者此有其四謂空無邊處乃至非想非非想處此中空無邊處等至者謂離種種色對礙想觀無邊空而為相應捨諸有相心住一境復次識無邊處等至無所有處等至非想非非想處等至此如是等皆

大藏經總目

卷下

經

寂靜行如初相應觀無貪相而為所緣餘復觀察無著無礙如應最上無相出生如是略說名四無色等至所言解脫者即八解脫謂內有色觀外色解脫乃至滅受想解脫此中初解脫者謂內有色想離外色貪是名內有色觀外色解脫復次如其行相內無色想離外色貪是名內無色觀外色解脫復次於色等清淨住無貪行是名淨解脫復次空無邊處解脫識無邊處解脫無所有處解脫非想非非想處解脫如是四無色處解脫皆如其行相任如實觀復次滅受想解脫行相應知如是略說名八解脫所言三摩鉢底先行者謂欲住彼空無邊處等諸三摩鉢底先當如應滅諸行相任法自性平等寂靜後當安住諸三摩鉢底此名先行又復當知此四無色等至及滅盡等至而諸菩薩於冒哩吟多位入師子遊戲三摩地現前而觀不為非三摩地多心之所間斷亦復不為初靜慮等之所間斷此滅盡等至是無動相此中諸三

摩鉢底何故次第如是謂成熟眾生如應所觀次第如是又復當知此即最上樂門獲是樂者了我無實我無實故自心寂靜所應修習諸神通波羅蜜多等皆勝慧所觀如實出生此即略攝一切法相所言解脫門者即三解脫門謂空無相無願此中空解脫門者謂若人若法諸蘊等事離分別相而彼蘊等若染若淨於分別相中畢竟無性於空法中離取捨相而無染智如實對治無相解脫門者謂於蘊等畢竟無相由無相故取不可得彼無染智如實對治不著諸相無願解脫門者謂於一切清淨解脫門蘊處界等及波羅蜜多圓滿勝行最上一切相皆如實知如實出生現前平等離諸所取願樂心故如是略說名三解脫門所言神通者有其六種謂天眼通乃至漏盡通此中天眼通者謂於諸色相正觀無礙最勝清淨天耳通者謂於一切音聲能聞清淨他心通者謂於他心一切行相能如實知宿住通

者謂自他過去諸差別事悉能記念神境通者此復有三謂隱顯自在隨諸世界種種現身於虛空中往來無礙隨所作轉如應現身如其所應不現身相作神通事漏盡通者謂諸無明貪等煩惱此名為漏智斷無餘名為漏盡如是等最勝六通安住菩提心離戲論智是諸菩薩勝上所修不共一切聲聞道等圓滿無相無發悟性是諸波羅蜜多平等道行總攝一切自所修法一切願力一切相故勇猛精進而為先導安住最上清淨心一境性初靜慮等如名如義隨應差別無邊行相總略攝故三摩陀耶所住持故如是略說名為六通所言陀羅尼者謂即彼一切相及一切法一切法性隨應總攝聲名句文為諸義相所有無量念無邊辯才及諸三摩地門彼無相智悉能證入對治有相有礙心故是即無上菩提最勝所得陀羅尼門而彼一切三摩地陀羅尼等金剛喻定現前證入即一切相普徧平等入無相智真實而證

六度論卷下 第七

一切種習皆悉捨離智觀平等大悲相應堅固所作於諸法性如實解脫勝報現前平等安住大圓鏡智如實出生一切願力皆悉圓滿如是略說名陀羅尼

所言力者即佛十力謂處非處智力乃至漏盡智力此中處非處智力者謂於一切處因果決定不決定智如實知若佛若梵王若轉輪聖王彼彼所得勝報決定名之為處彼非處者謂因果不決定行相應知業報智力者謂諸眾生作善業惡業生善趣惡趣此等業報智如實知種種界智力者謂諸眾生界趣差別智如實知種種勝解智力者謂諸聲聞等於諸法中起種種勝解離諸染法趣寂靜相此如是等智如實知了別諸根智力者謂諸眾生信等諸根種種差別智如實知種種定智力者謂初靜慮等諸三摩地三摩鉢底如名如義無邊行相智如實知至處道智力者道有二種謂非愛樂道即無明等可愛樂道謂寂滅等而彼滅者謂聲聞緣覺

菩薩論卷下 第七

及諸菩薩所證差別智如實知生滅智力者謂諸眾生種種生滅智如實知宿住隨念智力者謂於過去事如實記念漏盡智力者謂佛世尊大圓鏡智自性觀察離諸鄢染分別平等如是處非處等諸力如來遊戲神通所證此力具足故即一切法增上所觀如是略說名為十力

所言無畏者即四所畏謂一切智無畏漏盡無畏說鄢道無畏出苦道無畏此如是等若異若非異有所言說悉無所得無畏自在此四皆以平等性智而觀如如意寶隨眾生意普徧平等此法亦然我相清淨離諸有著如是略說四無所畏

所言無礙解者謂義法樂說辯才等此中義無礙解者謂於一切眾生無我相以微妙智平等而觀法無礙解者謂隨諸相了知諸法智觀平等樂說無礙解者謂隨所樂說能說所說不離自性辯才無礙解者謂於無邊法門隨應分別通達無相此如是等與一切法增上相應皆為攝彼諸愚

六度論卷下 第七

癡者令悉調伏安住諸法離相平等故此四皆以妙觀察智而觀如是略說四無礙解

所言大慈大悲者此中慈謂與眾生樂住寂靜心無發悟相廣大最勝離相平等悲謂拔苦調伏難調不捨眾生離諸有相此二皆成所作智而觀如是略說大慈大悲

所言佛不共法者即十八不共法謂如來身無失乃至現在知見無著無礙此中初者謂如來身無失無有疲倦離身諸過如來語無失者無非愛語離語諸過如來意無失者無有失念離意諸過如是三業為令愚癡者生淨信故無異想心者於一切眾生住平等心無不定心者為令愚癡眾生除散亂相無不知捨心者謂諸眾生事無有不知而捨者此等六法是被增上戒學所出生故與無住涅槃而為因故信無減者謂於無住涅槃中不壞信故欲無減者謂於無住涅槃不愛著故精進無減者謂於利於命於行悉無住故慧無減者謂畢竟

於諸世間長養衆生無不通達故解脫無減者謂不取聲聞等涅槃相故解脫知見無減者為利衆生智破戲論相令諸衆生各各平等證得無上涅槃此等六法是彼增上定學所出生故與無住涅槃而為緣故身業隨智慧行者謂於一切處若動若止經行等相常與智慧而共相應是故智慧而為先導語業隨智慧行者謂一切語言離妄分別常與智慧而共相應是故智慧而為先導意業隨智慧行者謂於衆生住平等心隨所利益無有差別常與智慧而共相應是故智慧而為先導過去知見無著無礙者謂內無有性名為無著外離諸縛名為無礙於過去一切法平等悉知破戲論相未來知見無著無礙者謂於未來一切法平等悉知破戲論相現在知見無著無礙者謂於現在一切法平等悉知破戲論相此等六法

法界清淨智所出生如是略說名十
八不共法
所言聲聞果者即四聲聞果謂須陀洹乃至阿羅漢此中須陀洹者厭苦忻樂隨應斷除所有煩惱七返生死見苦等諦悟人無我趣向涅槃斯陀含者厭苦忻樂隨應斷除所有煩惱一來此界見苦等諦悟人無我趣向涅槃阿那含者厭苦忻樂無餘欲界煩惱可斷不還欲界於色無色界隨應解脫見苦等諦悟人無我趣向涅槃阿羅漢者悉斷三界所有煩惱盡苦邊際悟無我理隨應解脫趣證涅槃如是略說四聲聞果
所言了知一切相者謂諸佛如來於一切相如實了知現前平等一切相者即一切法諸佛如來為利世間一切所向隨應方便得無忘失法住堅固相
此中應知三身亦名一切相法身自性無我智相無差別故報身最勝相即一切相智所依性故化身所作事相於一切處如應現化而施設故又

復一切相者雖所了知而無分別為利衆生隨應所作是相寂靜無緣自性一切平等所有蘊等一切相亦復無邊若在三界若出三界應如實了知諸相不可得如是名為了知一切相
所言真如者即一切法自性離取捨若智若愚若色若心住平等性離妄無分別是即名真如
所言實際者即菩提性一切如量如實離諸分別此中應知如佛所說於我益等性畢竟無所得復於他量而不可言說如是名為實際
所言無相者即彼真如說名無相而真如者但以名字假分別故於名字中性不可得當知我等性即諸法自性是故此中若人若法悉離諸相而同一相此一相者即一切法無對礙相離諸分別於第一義自性無動是名無相
所言法界者即十力等果法及諸因法乃至一切法自性所依是即法界此法界中遠離一切虛妄顛倒分別

大乘論卷下 第五張 字字

相等明慧現前如實照了是名法界
復次當知此中真如等大圓鏡智等
即一切法無所作門彼真如無所作
門即諸法自相門

復次當知此中真如及彼十力皆以
大圓鏡智而觀彼實際所證及四無
所畏皆以平等性智而觀彼無相微
妙清淨及四無礙解性皆以妙觀察
智而觀彼法界一切法真實所證所
依性及大慈大悲皆以成所作智而
觀所有一切處增上所觀法皆悉安
任法界清淨智

如是等一切法當知皆悉如量正語
與菩提心相應大慈隨順一切眾生
是一切法平等同一所緣相應無相
最上法門摠攝波羅蜜多等一切法
故隨其所行如量相應此相應故是
名一切法無我智者當知佛所說法
從解脫門如實出生
諸佛智慧無有上 所說因性亦無邊
於彼無邊如實知 一切相應而表亦
諸相應門顯諸性 隨宜方便而出生
大慧所作悉圓成 我為利樂故稱說

大乘論卷下 第五張 字字

集大乘相論卷下

集大乘相論卷下

校勘記

- 一 底本，金藏廣勝寺本。
- 一 六七二頁中三行譯者，徑、清作「宋西天三藏朝奉大夫試光祿卿傳法大師施護奉詔譯」；麗作「西天譯經三藏傳法大師賜紫沙門臣施護奉詔譯」。
- 一 六七二頁中八行第二字「若」，碩、南、徑、清、麗作「苦」。
- 一 六七三頁下一行第二字「自」，麗作「白」。
- 一 六七三頁下一五行「住持」，碩、徑、清作「任持」。
- 一 六七五頁中五行「忻樂」，麗作「欣樂」。七行同。
- 一 六七六頁上五行第一一字「十」，碩作「中」。